

## Mam - Xjan Tu'jil - Salvation Scriptures

Efeso 2:2 Nej cucx in cybincha'ne mya ba'n, in che oc lpe'ye ti'j cymod xjal, in xi cynimane tajaw il aju nejenel cye keju at cyipumal ate' twitz cya'j, atzun xewbaj jlu aju in ak'nan tuj cyanmi xjal miban che bin.

Matey 6:10 E ttzaj ju tcawbila. Bant-xwit ju tajbila twitz tx'otx' ic tza'n in bant tuj cyaj.

Lucas 22:42 ex tma: Tat, ka tajbila chin tcloma tu'n mi'n tic'x ju c'ixc'oj lu wu'ne; pero cuchiwt mi'n bant aju weye wajbil, o'cx aju teya tajbila, chi Jesús.

Juan 16:7-9 Pero ax toc in xi nma'ne cyeye: Mas ba'n te cyeye tu'n nxi'ye, porque ka minti' ma chinxe, mlay tzul cyuc'ile aju Onil cyeye ex K'ukbalte cyc'u'je; pero ka ma chinxe, ctzajel nsama'ne cyuc'ile. Octzun tul, cbel ti'j cynabl xjal tu'n, tu'n tel cynic' ti'j ka at cyl, ex tu'n tel cynic' ti'j ka tz'aklxix kine, ex tu'n tel cynic' ti'j ka at jwisi tzul tu'n Dios. C'elel cynic' ti'j ka at cyl porque minti' in che ocslan wi'je.

2 Timoteo 2:10 Cyja'tzun nnic'x tcyakil jlu wu'ne tu'nju at nc'ujlalile cyi'j keju sc'o'maj tu'n Dios, tu'ntzun icx cye tu'n cyc'monte jun colbil tbanilxix ex te jumajx, aju in tzaj tk'o'n Dios tu'nju at kmojbabl kib tuc'il Jesucrist.

Rom 15:20,21 Ex cyja'tzun nno'c tilil wu'ne tu'n t-xi nma'ne tkanil colbil jatum na'nxtok cybinte xjal tkanil ti'j Crist, tu'ntzun mi'n wak'nane jatum otok xe't tu'n jun tl xjal, 21 ic tza'n in tma'n tuj Tu'jil: Akeju bajx cybi tkanil ti'j, oc cyila', ex akeju na'nxtok cybinte tkanil ti'j, c'elel cynic' ti'j, chi tuj Tu'jil.

Cybinchben 2:36,37 Cybintze cycyakile jun yol axix toc, akeye aj Israel: Ate Jesús aju jaw cyk'o'ne twitz crus, ma tz'oc tk'o'n Dios te Kajaw ex ma tzaj tk'o'n toclen tu'n toc te Crist, chi Pedro cye. 37 Tejtzun cybinte xjal jlu, bi'x oc ta'w yol ti'j cyanmi, ex xi cyma'n te Pedro ex cye txkantl apostl: Akeye erman, ¿alcye oc kbincha'ye?

Hebreo 4:2 Porque icx ke ma tzaj k'ma'n tkanil colbil ke, ic tza'n tzaj k'ma'n cye; pero aju yol cybi aj Israel minti' ajben cye porque minti' xi cyocsla'n tej cybinte.

Jeremías 24:7 Cxel nk'o'ne cynabl tu'n tel cynic' ti'j ka akine Cyman; che oquel te jun tnam etzan wu'ne, atzun weye chin oquele te Cydios, porque che ajetz meltz'aj wuc'ile tu'n tcyakil cyanmi.

Cybinchben 16:14 At jun xu'j in bin, Lidia tbi, c'ayil xbalun puro tbanil ex wi'yilxix, aj Tiatira te xu'j lu, ex c'ulul te Dios; ex o tk'ajtza Kajaw tuj tanmi xu'j tu'n toc tk'o'n tcwent ti'j ju in tma'n Pablo.

Matey 13:14,15 Cyja'tzun tten ma japon cyi'j aju yol cyaj tma'n Isaías aju t-sanjel Dios. Chi Isaías: Cucx in cybi'ne, pero minti' nne'l cynic'e ti'j; ex cucx nno'c cyque'yine, pero minti' in cyile. 15 Porque aju cyanmi xjal lu ma cyuwix, minti' in xi cybi'n tu'n cyxycin ex ma cub cymaltz'u'n cywitz; tu'ntzun mi'n cylonte tu'n cywitz, ex tu'n mi'n cybinte tu'n cyxycin, ex tu'n mi'n tel cynic' ti'j tuj cyanmi, ex tu'n mi'n cyajtz meltz'aj tu'n cybanix wu'ne, chi Isaías.

Isaías 6:9,10 Naja'n baja cynabl ke xjal lu tu'n mi'n tocx tuj cywi', maksima tuj cyxycin tu'n mi'n cybinte, ex maksima cywitz tu'n mi'n tcyil ex tu'n mi'n tel cynic' ti'j, tu'ntzun mi'n tajtz ti'j cyanmi ex tu'n mi'n cybanix wu'ne, chi Kman weye.

Marcos 4:11,12 Xitzun tma'n Jesús cye: Te cyeye ma tzaj k'o'n tu'n tel cynic'e ti'j ju yol ti'j tcawbil Dios aju ewantok nej; atzun cye mastl xjal, tcyakil tu'n t-xi k'met

cye tuj techal, 12 tu'n mi'n tcyil aju in cyque'yin, ex tu'n mi'n tel cynic' ti'j aju in cybi'n, tu'ntzun mi'n cyajtz meltz'aj tuc'il Dios ex tu'n mi'n tcub najset cyl, chi Jesús cye.

Juan 12:39,40 Cyja'tzun minti' tumel tu'n t-xi cyocsla'n, porque at juntl yol o tma Isaías, chi cyja': 40 Cub moxix cywitz tu'n Dios, ex cyuwix cyanmi tu'n, tu'ntzun mi'n toc cyque'yin tu'n cywitz, ex tu'n mi'n tel cynic' ti'j tuj cyanmi, ex tu'n mi'n cyajtz meltz'aj tu'n cybanix wu'ne, chi tuj Tu'jil.

Rom 11:7,8 ¿Tza'ntzun tten jlu? Minti' e canun aj Israel ti'j ju in cyjyo'n; atzun keju sc'o'maj ke cyxol, ma che canun ti'j, ex txkantl cyuwix cyanmi; 8 ic tza'n in tma'n tuj Tu'jil: Ax Dios jpunte cynabl tu'n mi'n cylonte tu'n cywitz ex tu'n mi'n cybinte tu'n cyxycin, ex cucx cyten ja'lo, chi tuj Tu'jil.

2 Tesalónica 2:10,11 Ex tu'nju tbinchben mya ba'n che bel t-sbu'n ke xjal, akeju tu'n cyxi' tuj naben tu'nju minti' cygan ti'j tu'n t-xi cyniman ju yol axix toc tu'n cyclet. 11 Cyja'tzun, che xel ttzokpi'n Dios tu'n cysbunjtz tu'ntzun t-xi cyocsla'n ju nic'aj yol,

Matey 13:18-23 Cybinttzune ti in tma'n ju techal ti'j xjal xi' awal. 19 Jun xjal in tbi'n aju yol ti'j tcawbil Dios ex minti' nne'l tnic' ti'j, nnu'l tzun tajaw il, in jatz ti'n ju yol otok cu'x awa'n tuj tanmi xjal. Aju xjal lu ic tten ic tza'n be jatum cub tz'ak iyaj. 20 Ex aju xjal in xi tbi'n ju yol, ex jurat naj in xi tocsla'n tuc'il tzalajbil, aju xjal lu ic tten tza'n ke abj jatum cub tz'ak iyaj; 21 pero tu'nju minti' tloc' iyaj, nok cabe k'ij in cyaj ten. Icxtzun tten xjal ju. Oc in tzaj jun yajbil te ex oc tel ic'un cyu'n xjal tu'n tlaj tyol Dios, jurat in cub tz'ak. 22 Ex juntl xjal ic tten ic tza'n ju tx'otx' at ch'i'x cul tuj, porque in xi tbi'n tyol Dios, pero in baj tc'u'j ti'j nimcu tuj tk'ijlalil ja'lo ex in sbunjtz tu'n k'inumabl; cyja'tzun nne'l tipun tyol Dios tuj tanmi xjal ex minti' in witzan. 23 Atzun juntl xjal ic tten ic tza'n tbanil tx'otx' jatum cub tz'ak iyaj, porque in xi tbi'n ju yol ex nne'l tnic' ti'j, ex nno'c twitz iyaj tuj. At junjun nno'c jun syent twitz, ex at junjun nno'c 60 twitz, ex at junjun nno'c 30 twitz ti'j jun tkan, chi Jesús.

2 Corint 3:15,16 Ex cucx cyten ja'lo oc in jaw cysch'i'n tuj tley Moisés, ax toc ju xbalun makolte twitz cyanmi tu'n mi'n tel cynic' ti'j. 16 Pero oc cyajtz meltz'aj xjal tuc'il Kajaw c'elel k'i'n ju xbalun.

Isaías 30:28 aju t-xew mer ic tza'n jun nima in ch'iy nimxix ex in japun max tjak' tkul jun xjal; tzul tu'n cyabaj tchito'n ke nasyon ic tza'n tu'n sarand, tu'ntzun cynaj ex tu'n tocx tk'o'n jun pren tuj cytzi' ke xjal tuj nimcu tnam, tu'n cyel tzpet tu'n.

Oseas 11:3-7 Masque icju, akine inx xnak'tzante cye aj Efraín tu'n tbant cybet ex akine inx xaklunte cye, pero minti' el cynic' ti'j ka akine cwentil cye. 4 Tu'n tk'ak'bil nc'u'je ex tu'n nc'ujlalile e tzaj wi'ne tu'n cyul wuc'ile; el wi'ne aju iktz al tcubsa'ntok cyabaj, ic tza'n nne'l k'i'n yuw tibaj cykul wacx ex in cub tene c'a'chal cye. 5 Pero minti' cyajbe tu'n cyajtz wuc'ile. Cyja'tzun che ajel juntl maj tuj Ejipt ex aju cyrey aj Asiria ccawil cyabaj. 6 Tu'n spad che bel byo'n ke xjal cyuj cyanmi ex bi'x che bajel naj ke tlamel tnam, che najel xjal tu'n tlaj ju cyximabetz mya ba'n. 7 Ke xjal etzan wu'ne cucx tel cypa'n cyib wi'je, in jax cysch'i'n twitz cya'j, pero mi a'l jun in onin cyi'j.

Cybinchben 26:18 Cxel nsama'na tu'n tjaket cywitz tu'na, tu'n cyetz tuj klolj ex tu'n cyul tuj spic'un, ex tu'n cyetz tjak' tipumal Satanás tu'n cyul tuc'il Dios; ex tu'n

cyocslan wi'je, tu'ntzun tcub najset cyl ex tu'n cyc'monte jun etzbil cyxol keju pa'maj ke tu'n Dios tu'n cyajben o'cx te.

2 Timoteo 2:24-26 Porque aju tmajen Kajaw mya ba'n tu'n tk'ojin, nok o'cx tu'n toc mans cyuc'il cycyakil ex tu'n tten tnabl tu'n tk'onte xnak'tzbil, ex tu'n tten tpasens. 25 Ex mans tyol tu'n t-xi tca'win keju in che k'ojin ti'j, mya yajcu tz'ajtz ti'j cyanmi tu'n Dios tu'n tel cynic' ti'j ju yol axix toc, 26 tu'ntzun tjaw cyque'yin cywitz ex tu'n cytzokpet tuj tc'obil tajaw il jatum tzyu'n ke tu'n cybinchante alcyequ tajbil tajaw il.

Apocalipsis 3:17-19 Porque in cyma'ne cyja': k'inun ko'ye, nimxix at keye, ex minti' ch'in atx taj keye, che chiye, pero minti' nne'l cynic'e ti'j ka puro tuj bis ate'ye, ex minti' jun ba'n at cyeye, meba keye, moõ keye, ex minti' cyxbalune. 18 Cyja'tzun cxel nk'o'ne jun cyconseje: Cylak'onxe k'an pwak wuc'ile, saksamaj tu'n k'ak', tu'ntzun cyoque k'inun; ex cylak'onxe sak xbalun wuc'ile tu'n toc cyi'je tu'ntzun mi'n cych'ixwiye tu'nju minti' cyxbalune toc; ex cylak'onxe tk'anbil cywitze wuc'ile tu'n tocx cyk'o'ne tuj cywitze tu'ntzun tbanix cywitze. 19 Akeju c'ujla'n wu'ne in che'x ncawine ex in che cub tuj castiw wu'ne. Cyja'tzun tz'oc tililx cyu'ne ex tajtz ti'j cyanmiye.

2 Corint 7:10 Porque aju kbis in tzaj ic tza'nx tajbil Dios in ajtz ti'j kanmi tu'n tu'n kclet, ex mlay tzajtl kbis ti'j; atzun cye xjal cybis, in tzaj camic tu'n.

1 Reyes 18:37 Chin ttzak'wentza Nman, chin ttzak'wentza, tu'ntzun tel cynic' xjal ti'ja ka aya Dios ex in txacona cyi'j tu'n cyul meltz'aj juntl maj tuc'il, chi Elías.

2 Corint 4:4 Ke xjal lu mya ocsal ke, cyja'tzun ma moõsanjtz cynabl tu'nju cydios xjal at tuj tk'ijlalil ja'lo, tu'ntzun mi'n tel cynic' ti'j ju spic'un in koptz'aj cyabaj; aju spic'un lu atzun tkanil ba'n ti'j Crist, ex ate Crist tbanilxix ex tilbilal Dios.

Lucas 8:11-15 Atzun in tma'n ju techal lu: Aju iyaj, atzun tyol Diosju. 12 Aju be jatum cub tz'ak ju iyaj, atzun in yolin cyi'j xjal in xi cybi'n tyol Dios, pero jurat nnu'l tajaw il ex nne'l ti'n tyol Dios tuj cyanmi, tu'n mi'n t-xi cyocsla'n ex tu'n mi'n cyclet. 13 Aju pc'at jatum cub tz'ak ju iyaj tibaj, atzun in yolin cyi'j xjal in xi cybi'n tyol Dios ex in che tzalaj ti'j; pero minti' tloc' iyaj cyuj; nok te nic'xi cabe k'ij in xi cyocsla'n, octzun tul joybil cyl'i'j nne'l cypa'n cyib. 14 Aju tx'otx' at ch'i'x c'u'l tuj jatum cub tz'ak ju iyaj, atzun in yolin cyi'j xjal in xi cybi'n tyol Dios, pero cheba in xc'ost iyaj cyuj tu'nju in baj cyc'u'j ti'j nimcu, ti'j cyk'inumabl ex ti'j cyachbil, ex minti' in witzan iyaj cyuj. 15 Aju tbanil tx'otx' jatum cub tz'ak ju iyaj, atzun in yolin cyi'j xjal in xi cybi'n tyol Dios, porque ba'n cyanmi ex tz'aklxix, atzun cucx in xi cyc'u'n ju yol ex in tk'o'n twitz ju iyaj cyuj.

Cybinchben 15:11 Mya tuj tumel aju in cyma'ne, porque ic tza'n ke ma ke' kc'u'j ti'j ma ko clet tu'n t-xtalbil Kajaw Jesús, ic tza'nx cye ma che clet, chi Pedro xi tma'n cye.

Rom 8:13 porque ka ma che ank'ine ic tza'nx tajbil cychibjale, che cymele; katzun ma cub cyxitune aju tak'unben cychibjale nok tu'n Xewbaj Xjan, octzun che ank'ile.